


A decorative border made of repeating floral and leaf motifs surrounds the text on the page.

**E'TIBOR OXUNOVA**

**BUVIJONIM  
KELDILAR**

*Kichik yoshdagi bolalar  
uchun she'rlar*

**O'QITUVCHI" NASHRIYOT-MATBAA IJODIY UYI  
TOSHKENT — 2006**



Tanikli va iste'dodli shoira E'tibor Oxunova o'zbek adabiyotining rivojlanishiga samarali hissa qo'shdi. Chop etilgan o'nlab she'riy kitoblari keng o'quvchilar ommasiga ma'lum va manzur.

Shoiraning mazkur „Buvijonim keldilar“ to'plamiga jamlangan she'rlari kichkintoylarning ruhiy holatlarini, o'ziga xos fe'l-atvorini, murg'ak tuyg'ularini ifoda etgan.

U 4800000000 - 55 Buyurt. var. - 2006  
353(04) - 06

ISBN 5-645-04611-0

© „O'qituvchi“ NMIU, 2006

## OSMONDA OY QO'RIQCHI

Osmonda oy kulchasi,  
Belanchakda ukasi.  
Osmonga uzatilar  
Nuriddinning qo'lashi.

Bahriddinning ko'zlari  
Oymomoga mo'ltirar.  
Oymomajon taxtida  
Nurin sohib o'ltirar.

Bahriddinjon akasi,  
Nuriddinjon ukasi.  
Ikkisining ko'nglida,  
Oymomaning havasi.

Nuriddinga kular oy,  
Yursa yurar, u yo'lchi.  
Tun... Nuriddin uxlasa,  
Oy osmonda qo'riqchi.

\* \* \*

Ol lolalar poyandoz senga,  
Ona mehri sarafroz senga,  
Umrim guli — qalbim bahori,  
Bolajonim, dil hamroz senga.

## OYMOMANING KO'RPASI

Oyijonim alla aytganda,  
Erkalatib derlar: „toychog'im“.  
Men uxlayman, shunday paytda,  
Oymomajon yoqar chirog'in.

— Oymomajon uxlamas nega,  
Alla aytmaydimi oyisi?  
Hech to'xtamas, yurgani yurgan  
Oymomaning ko'rpasi qaysi?

— Osmon — oymomaning ko'rpasi,  
Yumshoq bulutchalar parqusi.  
Oy uxlasin, yulduz uxlasin  
Sochib-sochib kumush yog'dusin.

## LOCHIN

— Lochin, lochin amakim  
Osmonda ne qilarkin?

— Oyga qo'nib qaytadi,  
Bizdan salom aytadi.

Hozir oyda hoynahoy  
O'tirgandir ichib choy.



## NIGORA QIZ

Onasi erkalatar,  
Belanchagin tebratar.  
Uxlatolmay ovora,  
Ko'zin yumganda, zora...

Nigora qiz uxlamas  
Yig'isidan to'xtamas.  
Ostonada to'pchasi...  
Uzatar u qo'lchasin.

Ona to'pni keltirar,  
Qizchasiga mo'ltirar.  
Qizcha ketar uyquga  
Boshin qo'yib parquga.

Quchog'ida to'pchasi,  
To'pchasida qo'lchasi.

## CHAKKA

Yomg'ir yog'di...  
Kechasi,  
Chakka yig'lar  
Chakillab.  
Men o'yladim —  
Do'stlari  
Qo'ydimikin  
Yakkalab.

## QIZCHA PUCHUQQINA

Qizcha puchuqqina,  
Tili chuchukkina.  
Muncha bijillaysan  
Tinib-tinchimaysan.

Qo'g'irchog'i — „mehmon“ ,  
Jajji uychasida.  
Qizcha o'zi mezbon,  
Patnis qo'lchasida.

Sizlab mehmonini,  
Dasturxon tuzatadi.  
Zimdan oyijoni,  
Qizin kuzatadi.

Choy ham olib chiqar  
„Mehmon“ — qo'g'irchog'iga.  
So'ngra olov yoqar  
Jajji „o'chog'iga“.

## ARALASH

Yeyaverib aralash —  
Olma, uzum, shaftoli  
Ahmadjonning o'sha zum,  
Og'irlashdi ahvoli.

## **BUVIJONIM KELDILAR...**

Buvim keldi oqshom choq,  
Achom-achom qilishdik.  
Buvijonim bizga yong' oq,  
Kulcha, mayiz bo'lishdi.  
Puchuqqinam dedilar,  
Chuchukkinam dedilar...  
— Puchuq nima? — so'radim,  
— Chuchuk nima? — so'radim.  
— Olamda eng shirini —  
O'zingsan-da dedilar!

## **OLOV VA PALOV**

Onam qalab o'choqqa,  
Lovillagan olovni.  
Pishirdilar bir pasda  
Bizlar sevgan palovni.

## **TARVUZ**

Bobom ekan tarvuzni  
Beqasam choponi bor.  
Boqsam, qamashar ko'zim  
Yesam, og'zim to'la bol.

## NURIDDINJON QAYDA?

- Nuriddinjon qayda?
  - Bog‘cha degan joyda.
  - Bog‘chada ne qilarkin?
  - Ichadi shirin choylar.
- Yolg‘iz qolib buvisi,  
Sog‘inadi qo‘zisin.  
Jo‘nab qolar peshinda  
Kelib qolsa ko‘rgisi.
- Nuriddinjon qayda?
  - Bog‘cha degan joyda...

## ATAK-CHECHAK

Nuriddin atak-chechak,  
Bir qadam bosdi kecha.  
Qiqirlab kuldi biram,  
Uyimiz bo‘ldi bayram.  
Oppog‘im deyman doim,  
Ko‘z tegmasin iloyim.  
Nuriddin atak-chechak,  
Bir qadam bosdi kecha.  
Suyunar buvijoni,  
Topgandayin jahonni.



## KOPIK TALAŠIB...

Koptok o'ynardi Karim,  
Janjal chiqardi Salim.  
Koptogin tanib qolib,  
Karimga shovqin solib,  
Boshladi g'idi-bidi:  
— Koptok meniki, — dedi.  
Keyin shapaloq tortdi,  
Karimni qattiq turti.  
Do'stlar o'rtaga tushdi,  
Salimjonga deyishdi:  
— Nega urasan uni?  
— Nega turtasan uni?  
— Bo'laveradi ursam,  
Karim o'zimning ukam! —  
Deya Salim taltaydi,  
U haqmi? Kim aytadi?

## IRMOQCHA

Baland-baland tog'lardan  
Sakrab tushar irmoqcha,  
Chopib kelayotganday  
Oppoq yolli toychoqcha.

A decorative border of small flowers and leaves surrounds the text.

## BIZ PAROVOZMIZ

Osmon qor elar —  
Yetib keldi qish.  
Hovlida bizlarga  
Topildi xo‘p ish.  
Muz yo‘laklarda  
Chang‘i uchamiz,  
Bolakaylarga  
To‘lar ko‘chamiz.  
Eng ajoyibi —  
Biz parovozmiz,  
Tutun chiqadi  
Ochsak og‘zimiz.

## TURNALAR

Uchib keldi turnalar  
Solib arg‘imchog‘ini.  
Ko‘chib keldi turnalar,  
Sog‘inib oshyonini.



## QALAMPIR

Nimaligin bilmabman,  
Nazar-pisand qilmabman.

Tishlabman qalampirni,  
Og'zinga olov kirdi.

Yugurtirdi zir-zir...  
Mitti polvoncha qurg'ur.

Tilim yonar, lovullar,  
Ko'z yoshlarim shovullar.

Rosa dodlab qichqirdim,  
Ta'zirimni xo'p yedim.

## BOBOMNING NOSVOYI

Bobomlarning nosvoyini  
Totib ko'rdim... voy-voy-ey,  
Tilim chaqdi hoynahoy —  
Bir chimdim qalampirvoy.

## HAYVONOT BOG'IDA

Dam olish kun dadasi  
Olib bordi zooparkka.  
Erkinjonning quvonchi  
Sig'mas edi yurakka.

Jilvalanib, rang-barang  
Tovlanar tovus pati.  
Yelpig'ich bo'ldi qarang,  
Go'zal ekan san'ati.

Dor o'ynovchi maymuncha,  
Diqqatin tortar birdan.  
U ko'z ochib-yumguncha,  
Shipga sakraydi yerdan.

Zebrani ko'rganida,  
Erkinjon qoldi hayron.  
Ishondi: bor ekan-da,  
Beqasam to'nli hayvon?!

Dam olish kun dadasi  
Olib bordi zooparkka.  
Erkinjonning quvonchi  
Sig'mas edi yurakka.

## BOG'CHAMIZ

(qo'shiq)

Soya-salqin bog'chamiz,  
Quvonamiz barchamiz.  
O'ynaymiz toychoq minib,  
Gohi karuselchamiz.

Suzib borar qiyiqcha,  
Kapitani men o'zim.  
Anvar haydar vertolyot,  
Muzaffardan ham o'zib.

Qumdan yasaymiz tog'lar,  
Kanalga suv quyamiz.  
Xilma-xil qo'g'irchoqlar,  
Barin birdek suyamiz.

Rustam har kuni „TU“ da  
Moskvaga uchadi.  
Doston vannada suvda  
Baliq bo'lib suzadi.

Bog'cha opamiz bizni  
Suyadilar erkalab,  
Shuning-chun biz shoshamiz  
Bog'chamizga ertalab.

## UYIMIZ

Osmon bilan o'pishgan,  
Quyosh bilan ko'rishgan,  
Biram, biram kelishgan,  
Binodadir uyimiz.

Tongda quyosh charaqlar,  
Oqshom ming-ming chiroqlar.  
Biram havasim kelar  
Oydin yaqin-yiroqlar.

Katta shahar... tramvay,  
Trolleybus g'izillar.  
Marjonlar qadalganday  
Lampochkalar tizilgan.

Yerning osti bir shahar,  
Metrolari uchadi.  
Unga tushsam har safar  
Es-u hushim uchadi.

Hamma yoqda chiroqlar,  
Qizil, yashil, lolarang.  
Ko'kda oy chinchiroqday  
Ko'rinar arang-arang.

Uyimizdan qarasam  
Keng dunyo ko'ringanday.  
Aytsam gapning sirasin —  
Osmonda yurgandayman.

## ALIFBE

Sinfga keldi kirib  
Harf to‘la „Alifbe“.  
Doska oldida turib,  
Bizlarga dedi shunday:  
— Salom sizga, bolalar!  
Olib keldim sovg‘alar.  
Yigirma to‘qqizta harfim,  
Hammasi kerak, muhim.  
Nasihatim uqingiz,  
Diqqat bilan o‘qingiz.  
Bo‘lsak bizlar qadrdon,  
Do‘stlashsak, omon-omon.  
Beraman ertak aytib,  
Tunlari qaytib-qaytib.  
Juda qiziq gaplarni,  
Hatto she‘r-u baytlarni,  
Sizga so‘zlab berardim,  
Ko‘nglingizni olardim.  
Tezroq chiqaring savod,  
Harflarni oling yod!

## HARF O'RGANISH

Uch yoshli sho'x Zarifni  
Qiziqtirar harflar.  
Harfni harfga qo'shishni  
Va so'zlarni o'qishni  
Juda orzu qilardi  
Kichkintoy Zarif.

— Oyi! — deb qilar xitob —  
Men ham o'qiyman kitob.  
Mashq boshladik betinim,  
Lekin ishda yo'q unum:  
„Sh“ ni o'rgatsam qarang,  
„S“ deya olar arang.

Olchada „O“ bosh bo'lar,  
Yo'lbarsda-chi, „Y“ kelar.  
„O“ ga „Y“ ni qo'shib ber,  
Va ma'nosin yechib ber  
Desam, u sevingancha,  
Deydi: — Yo'ybaysman Oycha.



## TILIN CHO'QIBDI HAKKA


Kichkina ukam Doston  
O'qishni sevar rostdan.  
Har kun harf o'rganar,  
O'rganolmay surgalar.  
Yarim kecha bo'lsa ham,  
O'qiydi, chuldiraydi.  
Ko'zlari mudrasa ham,  
Kitobga mo'ltiraydi.  
O'rgatay dedim uni,  
Kitob tutib har kuni.  
„Sh“ ni o'rgatsam qarang,  
„S“ deydi ukam arang.  
„Y“ deydi „R“ ni desam,  
„T“ der „K“ ni ko'rsatsam.  
Nega u chuchuk so'ylar?  
Mundoq qarasam, o'ylab,  
Mashqlar chiqdi chi ppakka...  
Tilin cho'qibdi hakka.

## BINAFSHAXON, BINAFSHA

Binafshaxon, binafsha,  
Kulib turar hamisha.  
Qish bo'lsa binafshajon  
Qaylarda saqlaydi jon?  
Tuproq uning onasi,  
Binafshaning hammasin  
O'raydi choponiga  
Oro kirar joniga.  
Uyg'onganda dalalar,  
Qush chalsa sibizg'alar,  
Binafshasin yo'rgaklab,  
Sochlarini turmaklab,  
Bayramlarni kutadi,  
Qizchalarga tutadi.  
Binafshaxon jilmayar,  
Uchib kelsa turnalar.

## JILG'A


Jilg'a oqar o'ynoqlab,  
Betashvish o'z yo'lida.  
Chuldirab, ko'nglin chog'lab,  
Boqmay o'ng-u so'liga.  
Birdan duch kelib qoldi  
Toshqin, shoshqin daryoga.  
Quvonchlari yo'qoldi,  
Bir zum toldi xayolga:  
Qaytsinmi o'z yo'liga?  
Yo'q, jasorat topdi u:  
Chopdi daryo bo'yiga,  
Qarshi oldi ulkan suv.  
Jilg'a yo'lda ravona...  
Obod qildi cho'llarni.  
G'o'zalar otdi shona,  
Gulga ko'mdi yo'llarni.  
Bolalar cho'milishar,  
To'lqinga ko'milishar.  
Surib shirin xayollar,  
Soch tarar majnuntollar,  
Jilg'a yo'lda ravona...  
O'z ishidan quvona,  
Der: daryo hayot singari  
U yaxshilik sarvari.



Jilg'a yo'lda ravona —  
O'z ishidan quvona,  
Daryoning o'rtasida  
Ko'rib qoldi to'satdan  
Yuk ortgan ulkan kema.  
O'yladi, zavodmikan?!  
Yana qo'rquvda qoldi,  
Bir zum xayolga toldi:  
Qaytsinmi orqasiga?  
Yo'q, jasorat topdi u  
Ko'tardi yelkasiga  
Kemani to'lqin bo'lib,  
So'ng dengizga uzatdi,  
Uzoq yo'lga kuzatdi.  
Jilg'a yo'lda ravona...  
Hali qilar yumush ko'p.  
U der: ulkan daryoda  
Yashash gashtli ekan xo'p

## TONG, NIMA U BOLALAR?

— Tong... u nima bolalar,  
Ayting-chi gul-lolalar?  
Nega tongni kutishar  
Tabiat, gul, bolalar?  
Nega tongda kuy chalar  
Bulbul sakrab butoqda?  
Bol yig'gani arilar  
Shoshilar qirga, bog'ga?  
Nega qurt-u qumursqa  
Tong bilan teng turishar?  
Kapalaklar tinmayin  
Guldan gulga qo'nishar?  
Tong otdimi, bolalar  
O'ynagani chopadi.  
Qizaloqlar taranib,  
Oynachaga boqadi.  
Onalar ham tong bilan  
Oppoq dasturxon yozar.  
Dasturxonga sut, qaymoq,  
Patir, kulchalar tuzar.  
Buvilar xursand bo'lib  
Qo'l ochishar duoga.  
Nega tongga peshvozdir  
Qurt, qumursqa, odamlar?



Qushlar ovozi sozdir,  
Ko'chalarda qadamlar.  
Tong — bu quyosh kulgusi  
Undan quvonch to'kilar.  
Quyosh kulsa kuy, qo'shiq  
Allalar ham to'qilar.  
Tong uyqudan uyg'otib,  
Mehnat sari uzatar.  
Quyosh o'zi har yerda,  
Ishimizni kuzatar.  
Quyosh chiroy ulashar,  
Gullarga, nok, anorga.  
Qushlar ham quv-quvlashar  
Jo'r bo'lishib navoga.  
Quyosh maza kirgizib,  
Shakar qilar uzumni.  
Polizda qovun-tarvuz,  
Qamashtirar ko'zimni.  
Oqshom xorib bosh qo'yar  
U yumshoq parqusiga.  
Odamlar ham xo'shlashib  
Yotishar uyqusiga.

## OLCHA

(Maryam Qosimovadan)

Kunlar issiq, yoz chog'i,  
Yashnar Rozaning bog'i.  
Mevalari turfa xil,  
Olchalar pishgan hil-hil.  
O'rtoqlari kelishib,  
So'radilar kulishib:  
— Olchalaring pishdimi,  
Taglariga tushdimi?  
Qani, terib kel-chi, biz  
Bo'lib yeylik barimiz.  
Roza bunga ko'nmadi,  
O'rtoqlariga dedi:  
— Uzilmaydi, pishmagan,  
Tagiga ham tushmagan.  
Do'stlar ketdilar nochor,  
Dillari topib ozor.  
Roza olchadan terib,  
Shoshilib nari-beri,  
Oppoq etakka soldi,  
Uyga yugurib qoldi.  
Olcha yer-u ko'ngli to'q,  
Ko'ylakdan xabari yo'q:  
Oppoq ko'ylak shalabbo,  
To'kilganday murabbo.

## QIRQ KISHIGA BIR MAYIZ

Qirq kishiga yetadi  
Bo'lib yesa bir mayiz.  
Hammayoq soz, chiroyli  
Ochiq ko'ngil bo'lsangiz.  
Bizda tili zaharlarni  
Deydilar: dil ozori,  
Lekin yaxshi, yomon fe'lining  
Yo'qdir biror bozori.  
Neki ko'rsa odam o'zin  
Qilmishidan ko'radi.  
Achchiq yoki shirin so'zni  
Aytishidan bo'ladi.  
Odam bo'lsa, so'zi shirin,  
Mehnatni sevsa ular  
Tog'day ish ham oppa-oston  
Hech malolsiz qilinar.  
Qirq kishiga yetib ortar  
Bitta kichik mayiz ham.  
Inoqlik yo'q bo'lsa, hatto  
Qurir daryo, dengiz ham.





## KUZ

Yerga to'shabdi gilam  
Daraxtlarning bargidan.  
Qarang: chiroyli biram  
Xuddi tillo rangida.

## QISH

Qor yog'ibdi, ko'chamiz  
Oyna kabi yaraqlar.  
Boplab chang'i uchamiz,  
Yursak muzlar taraqlar.

Uyimizning derazasi  
Chiroyli bo'пти rosa.  
Qorbobo chizgan rasmi  
Ajabmaski shu bo'lsa.

## KALISH SHIKOYATI

Kumushdan chopon kiygan  
Hamma uylar, daraxtlar.  
Tarnovlarga osilgan  
Sumalaklar karaxtlar.  
Yaxmalak hamma yoqda,  
Erkin sirpanchiq uchar,  
Yangi kalish oyoqda,  
Muzdan muzlarga ko'char.  
Yig'lar bechora kalish,  
Deydi: „Og'aynichalish,  
Voy-voy to'kildi tishim,  
Zirqirab og'rir boshim“...  
Kalish yirtilib ketdi,  
Tishi to'kilib bitdi.  
Dodlar kalishi yuz bor,  
Erkinning ne ishi bor.  
Sirpanchik yo'l yaraqlar,  
Erkin ko'ngli charaqlar.  
U yiqildi gursillab,  
Turib boqdi harsillab,  
Kalishda tish qolmabdi,  
Voy, yaxshi ish bo'lmabdi.



## TUG'ILGAN KUNIM

Mening tug'ilgan kunim  
Har yil bayram qilamiz.  
Bog'chamizda shod-xandon  
Bizlar davra quramiz.

Bugun bog'cha opamiz  
Shokolad, tort ulashdi.  
O'yin-kulgu avjida,  
Barcha quv nab yayrashdi...



## **OLIB CHIQDI TUMOVNI...**


Terlab Erkin tunov kun,  
Tushdi muzdek ariqqa.  
Tumovni olib chiqdi,  
Sihatligin, sog'ligin,  
Qoldirib u baliqqa.

## **MUSTAQILLIK MAYDONI**

Toshkentim markazida,  
Mustaqillik maydoni.  
O'sha joyda jamuljam,  
Bobolarim armoni!

## MUNDARIJA

Osmonda oy qo'riqchi .....	3
Oymomaning ko'rpasi .....	4
Lochin .....	4
Nigora qiz .....	5
Chakka .....	5
Qizcha puchuqqina .....	6
Aralash .....	6
Buvijonim keldilar .....	7
Olov va palov .....	7
Tarvuz .....	7
Nuriddinjon qayda? .....	8
Atak-chechak .....	8
Koptok talashib .....	9
Irmoqcha .....	9
Biz parovozmiz .....	10
Turnalar .....	10
Qalampir .....	11
Bobomning nosvoyi .....	11
Hayvonot bog'ida .....	12
Bog'chamiz .....	13
Uyimiz .....	14
Alifbe .....	15
Harf o'rganish .....	16
Tilin cho'qibdi hakka .....	17
Binafshaxon, binafsha .....	18



Jilg'a .....	19
Tong, nima u bolalar? .....	21
Olcha ( <i>Maryam Qosimovadan</i> ) .....	23
Qirq kishiga bir mayiz .....	24
Kuz .....	25
Qish .....	25
Kalish shikoyati .....	26
Tug'ilgan kunim .....	27
Olib chiqdi tumovni .....	28
Mustaqillik maydoni .....	28

**E'TIBOR OXUNOVA**

**BUVIJONIM KELDILAR**

*Kichik yoshdagi bolalar uchun she'rlar*

*„O'qituvchi“ nashriyot-matbaa ijodiy uyi*  
*Toshkent — 2006*

**Muharrir G. Nasriddinova**  
**Badiiy muharrir Sh. Xo'jayev**  
**Texnik muharrir S. Tursunova**  
**Kompyuterda sahifalovchi N. Ahmedova**  
**Musahhah M. Ibrohimova**

IB № 8768

Original-maketdan bosishga ruxsat etildi 1.04.2006.

Bichimi 84×108<sup>1/32</sup>. Kegli 12 shponli. Tayms garn. Ofset bosma usulida bosildi. Bosma t. 2,0. Shartli b.t. 1,68. Nashr.t. 1,0  
2000 nusxada bosildi. Buyurtma № 48.

O'zbekiston Matbuot va axborot agentligining „O'qituvchi“ nashriyot-matbaa ijodiy uyi. Toshkent — 129, Navoiy ko'chasi, 30-uy. //Toshkent, Yunusobod dahasi, Murodov ko'chasi, 1-uy. Shartnoma № 12—24—06.

O-94 **Oxunova, E'tibor**  
Buvijonim keldilar: She'rlar/E. Oxunova.  
- T., „O'qituvchi“ NMIU, 2006-32 b.

BBK 84 (5U) 6